



Deuant dera Proposicion Non de Lei discutida e votada, eth passat 19 de març de 2024, en Congrès des Deputats ena que se demane qu'er Estat hèsque ua assignacion de hons estructuraus entar Institut d'Estudis Aranès-Acadèmia Aranèsa dera Lengua Occitana, aprovada damb eth vòt favorable des grups parlamentaris Republican, Junts per Catalunya, Euskal Herria Bildu, Sumar e Popular; damb eth vòt en contra deth grop parlamentari de VOX e era abstencion deth grop Socialista, er Institut d'Estudis Aranès-Acadèmia Aranèsa dera Lengua Occitana vò

E X P R E S S A R

- 1.- Qu'era lengua occitana ei oficiau en Catalonha e per tant en Estat espanhòl.
- 2.- Qu'era Generalitat de Catalonha a era competència, transferida per Estat (article 125 der Estatut d'Autonomia de Catalonha), entà crear acadèmies en Catalonha.
- 3.- Qu'er Institut d'Estudis Aranès-Acadèmia Aranèsa dera Lengua Occitana ei era autoritat sus era lengua occitana per decision dera Generalitat de Catalonha d'acòrd damb eth Conselh Generau d'Aran, a partir deth Decrèt 12/2014, de 21 de gèr, peth quau s'autrege ar Institut d'Estudis Aranès eth caractèr d'acadèmia e d'autoritat lingüística der occitan.
- 4.- Que pendent aguesti dètz ans era Acadèmia a definit era lengua, establìt era gramatica, elaborat vocabularis e diccionaris, e a passat era investigacion materializada en nombroses publicacions e difusions, atau coma estudis e d'auti projectes ar entorn dera lengua occitana.
- 5.- Que totes es acadèmies des autes lengües oficials der Estat, qu'exercissen era autoritat lingüística, receben ajudes estructuraus entath sòn foncionament per part deth Govèrn espanhòl. Inclús, existissen acadèmies de lengües sense estatut d'oficialitat que receben hons estructuraus. En cambi, es ajudes qu'a rebut er Institut d'Estudis Aranès-Acadèmia Aranèsa dera Lengua Occitana per part der Estat, que comencen en exercici 2022, an estat subvencions annaus negociades en moment dera aprobacion des pressupòsti, çò que dificulte era prevision e estabilitat economica e administrativa dera institucion.

Per tot açò,

A R R E G R A Ì M

as pòrtavotz e as grups parlamentaris Republican, Junts per Catalunya, Euskal Herria Bildu, Sumar e Popular, eth sòn vòt favorable entà establir ua situacion justa entara lengua occitana, coma lengua cooficiau der Estat, e

L A M E N T A M

- 1.- Qu'eth pòrtavotz e tot eth grop parlamentari de VOX agen votat en contra d'aguesta assignacion que permete eth foncionament estable dera Acadèmia Aranèsa dera Lengua Occitana.
- 2.- Qu'eth grop parlamentari Socialista, deth quau forme part er unic deputat aranès en Congrès, s'age abstengut ena votacion en un intent de bloquejar era assignacion. E mès encara quan recentament, per part deth Conselh Generau d'Aran, jos un govèrn d'Unitat Aran, partit omològ deth PSOE, s'a decidit deishar de subvencionar ara Acadèmia.

Aprovat per unanimitat des membres dera Seccion Aranèsa der Institut d'Estudis Aranès-Acadèmia Aranèsa dera Lengua Occitana eth 24 d'abriu de 2024.

Acordam hèr arribar aguesta declaracion a toti es grups parlamentaris deth Congrès des Deputats, publicar-la ena pagina web dera Acadèmia e hèr-ne difusion a trauès des mieis de comunicacion que se considèren pertinents.